

# ՀՈՒՇԱԳԻՐ

## ՀՀ գյուղատնտեսության նախարարության և Կաթնամթերք արտադրողների միության միջև կաթնամթերքի արտադրության ոլորտի բնականոն գործունեությունն ու զարգացումն ապահովելու նպատակով համագործակցության վերաբերյալ

ք. Երևան

26 փետրվար 2014թ.

Հայաստանի Հանրապետության գյուղատնտեսության նախարարությունը (այսուհետ՝ նախարարություն), ի դեմս նախարար Սերգո Կարապետյանի և «Կաթնամթերք արտադրողների միություն» իրավաբանական անձանց միությունը, ի դեմս նախագահ Ղուկաս Բունիաթյանի, որը գործում է Կանոնադրության հիման վրա, միասին հիշատակելիս այսուհետ՝ Կողմեր,

Հիմնվելով Հայաստանի Հանրապետության գյուղի և գյուղատնտեսության 2010-2020 թվականների կայուն զարգացման ռազմավարության դրույթների, մասնավորապես՝ կաթնամթերքների արտադրության զարգացման, թարմ և վերամշակված կաթի օգտագործման կարգավորման, պարենային ապահովման մակարդակի բարձրացման, միջազգային համագործակցության զարգացման ու շուկայահանման հնարավորությունների ընդլայնման վրա, պատրաստակամ լինելով համագործակցել այդ նպատակին հասնելու համար, կնքեցին սույն Հուշագիրը հետևյալի մասին.

### **Հոդված 1. Հուշագրի շրջանակը**

Կողմերը համաձայնվեցին համագործակցել տեղական արտադրության կաթնամթերքի զարգացման, արտահանման խրախուսման և տեղական կաթնամթերքի մրցունակության բարձրացմանն ուղղված հետևյալ ուղղություններով.

- կաթնամթերքի որակի և անվտանգության ապահովում,
- նպատակային շուկաներում համատեղ ջանքերով հայկական արտադրանքի վարկանիշի արդյունավետ առաջմղում,
- կաթնամթերք արտադրողների գործունեության կարգավորում, արտադրողներին խորհրդատվության տրամադրում, ոլորտին առնչվող տեղեկատվության փոխանակում, նոր տեխնոլոգիաների և սարքավորումների ներդրման հետ կապված օժանդակության տրամադրում,
- կաթնամթերքի արտադրության համար օգտագործվող կաթի որակի բարելավմանն ու ծավալների ավելացմանն ուղղված աշխատանքների կազմակերպում,
- կաթնամթերքի վերաբերյալ օրենսդրության ուսումնասիրություն, անհրաժեշտության դեպքում օրենսդրական նախաձեռնությունների և բարեփոխումների գործընթացին մասնակցություն:

## **Հոդված 2. Համագործակցության սկզբունքները**

Կողմերը համաձայնվեցին համագործակցության համար հիմք ընդունել հետևյալ սկզբունքները.

- ծրագրերի համատեղ մշակման ու իրականացման գործընթացում միության անդամների մասնակցության ապահովում,
- միջազգային մասնագիտացված ցուցահանդեսներին, ֆորումներին, գիտաժողովներին և ոլորտին վերաբերող այլ միջոցառումներին միության անդամների մասնակցության ապահովում,
- առաջիկա 6 տարվա (2014–2020թթ.) համար Հայաստանի Հանրապետությունում կաթնարդյունաբերության (կաթի արտադրության, վերամշակման) ոլորտի զարգացման հեռանկարային ծրագրի համատեղ մշակում և կազմում,
- արտահանման նոր շուկաների բացահայտում, այդ շուկաներ մուտք գործելու հետ կապված խոչընդոտների բացահայտում, անհրաժեշտության դեպքում դրանց վերաբերյալ առաջարկությունների ներկայացում:

## **Հոդված 3. Կողմերի համաձայնությունը**

ՀՀ գյուղատնտեսության նախարարությունը և «Կաթնամթերք արտադրողների միություն» իրավաբանական անձանց միությունը համաձայնվում են.

- ընդհանուր հետաքրքրություն ներկայացնող նպատակների մշակման ուղղությամբ անցկացնել խորհրդակցություններ, գործնական հանդիպումներ, սեմինարներ՝ տեղական և միջազգային կառույցների ներգրավմամբ, կլոր սեղաններ և այլ միջոցառումներ,
- համատեղ ջանքերով խթանել տեղական կաթնամթերքի արտադրության ու վերամշակման համար տնտեսապես շահավետ պայմանների ապահովմանը,
- աջակցել միության անդամ ընկերություններում որակի և անվտանգության կառավարման համակարգերի (ԻՍՕ 22000, HACCP և այլն) ներդրմանը,
- միջազգային ստանդարտների հիման վրա իրականացնել աջակցություն որակի համակարգերի ներդրման ուղղությամբ, որոնք ուղղված են տեղական կաթնամթերքի որակի բարձրացմանը,
- մասնակցել սույն Հուշագրի իրականացման աշխատանքներին, Կողմերի կազմակերպած հանդիպումներին, քննարկումներին ու միջոցառումներին (սեմինարների, գիտաժողովների, կլոր սեղանների և վերապատրաստման դասընթացներ),
- տրամադրել համատեղ ծրագրերի վերաբերյալ սույն Հուշագրի իրականացմանն առնչվող անհրաժեշտ տեղեկատվություն:

## **Հոդված 4. Ակնկալվող արդյունքները**

- Կաթնամթերքի արտադրության ոլորտի կայուն զարգացման ապահովում
- Հայկական արտադրանքի որակի և միջազգային մրցունակության բարձրացում
- Ժամանակակից տեխնոլոգիաների ներդրում
- Արտահանման շուկաների պահպանում և նոր շուկաներ մուտքի ապահովում:

## **Հոդված 5. Իրագործում**

Կողմերը համաձայնվում են համագործակցությունն իրականացնել պետություն և մասնավոր հատված համագործակցության սկզբունքով՝ նախարարության կողմից մշակվող և իրականացվող ոլորտի ռազմավարական միջոցառումների շրջանակներում:

Կողմերը գործողություններն իրականացնում են ՀՀ գյուղի և գյուղատնտեսության 2010-2020 թվականների կայուն զարգացման ռազմավարության կատարումն ապահովող միջոցառումների, ինչպես նաև սույն հուշագրով ստանձնած հանձնառությունների շրջանակում:

Կողմերը գործողությունների իրականացման ընթացքում պահպանում են սույն Հուշագրի դրույթները և համատեղ աշխատանքի ընթացքում ապահովում փոխըմբռնման մթնոլորտ, բոլոր հարցերի առնչությամբ իրականացնում համաձայնեցված աշխատանք և ցուցաբերում աջակցություն:

## **Հոդված 6. Հուշագրի գործողության ժամկետը և դադարեցումը,**

Սույն հուշագիրը կնքվում է 5 տարի ժամկետով, որի ժամկետը կերկարաձգվի ևս 5 տարով կողմերի համաձայնության դեպքում:

Հուշագրի գործողությունը կարող է դադարեցվել, եթե կողմերը պարբերաբար չեն կատարում սույն հուշագրով ստանձնած հանձնառությունները: Նման իրավիճակի ստեղծման դեպքում հարցը քննարկվում է Հուշագիրն ստորագրած Կողմերի համատեղ խորհրդակցությունում և կայացվում որոշում՝ Հուշագրի գործողությունը դադարեցնելու մասին:

**ՀՀ գյուղատնտեսության նախարար**

**«Կաթնամթերք արտադրողների միություն»  
իրավաբանական անձանց  
միության նախագահ**

**Սերգո Կարապետյան**

**Ղուկաս Բունիաթյան**